

«Հանրակրթության մասին» Հայաստանի Հանրապետության օրենքում լրացումներ և փոփոխություններ կատարելու մասին» ՀՀ օրենքի նախագիծը

ՆԱԽԱԳԻԾ

ՀԱՅԱՍՏԱՆԻ ՀԱՆՐԱՊԵՏՈՒԹՅԱՆ

ՕՐԵՆՔ

«ՀԱՆՐԱԿՐԹՈՒԹՅԱՆ ՄԱՍԻՆ»

ՀԱՅԱՍՏԱՆԻ ՀԱՆՐԱՊԵՏՈՒԹՅԱՆ ՕՐԵՆՔՈՒՄ

ԼՐԱՅՈՒՄՆԵՐ ԵՎ ՓՈՓՈԽՈՒԹՅՈՒՆՆԵՐ ԿԱՏԱՐԵԼՈՒ ՄԱՍԻՆ

Հոդված 1. «Հանրակրթության մասին» Հայաստանի Հանրապետության 2009 թվականի հուլիսի 10-ի ՀՕ-160-Ն օրենքի լայսուհետ՝ Օրենքի 3-րդ հոդվածը լրացնել հետևյալ բովանդակությամբ նոր՝ 6.1-րդ և 6.2-րդ կետերով.

«6.1) **հեռավար (դիստանցիոն) կրթություն**՝ այլընտրանքային կրթական ծրագրի ձև, որի շրջանակներում անմիջական և ոչ անմիջական ուսուցման գործընթացը սովորողի և ուսուցչի միջև իրականացվում է հիմնականում տեղեկատվական տեխնոլոգիաների և հեռահաղորդակցության միջոցներով,

6.2) **կրեդիտային համակարգ**՝ միջնակարգ կրթության երրորդ աստիճանի (10-12-րդ դասարաններ) ուսումնական գործընթացի կազմակերպման, սովորողների ուսումնական առաջադիմության ընթացիկ և ամփոփիչ գնահատման, կրթական ծրագրերի յուրացման կրեդիտների միջոցով չափման, հաշվառման և փոխանցման համակարգ,»:

Հոդված 2. Օրենքի 29-րդ հոդվածի 1-ին մասը լրացնել հետևյալ բովանդակությամբ նոր՝ 13.1-րդ և 18.1-րդ կետերով.

«13.1) սահմանում է ուսուցիչների կամավոր ատեստավորման կարգը.»:

«18.1) սահմանում է Հայաստանի Հանրապետության պետական բյուջեով նախատեսված ծրագրերի ֆինանսավորման սկզբունքները և մեթոդաբանությունը.»:

Հոդված 3. Օրենքի 30-րդ հոդվածի`

1. 1-ին մասի 13-րդ կետը շարադրել հետևյալ խմբագրությամբ.

«13) սահմանում է դպրոցական տարիքի երեխաներին հանրակրթության մեջ ընդգրկելու և հանրակրթությունից դուրս մնացած երեխաներին բացահայտելու և հանրակրթության մեջ ընդգրկելու կարգը.»,

2. 1-ին մասի 23-րդ կետից հանել «, պետական տեսչավորում» բառերը,
3. 1-ին մասի 25-րդ կետում «հանրապետական» բառից հետո լրացնել «և դպրոցական» բառերը,
4. 1-ին մասը լրացնել հետևյալ բովանդակությամբ նոր` 2-26.13-րդ կետերով.

«26.2) սահմանում է դասագրքերի և ուսումնաօժանդակ գրականության ստեղծման չափանիշները և գործիքակազմը սահմանելու կարգը.

26.3) սահմանում է սոցիալապես անապահով ընտանիքների սովորողների դասագրքերով ապահովելու կարգը.

26.4) սահմանում է միջնակարգ կրթության երրորդ աստիճանի (10-12-րդ դասարաններ) կրեդիտային համակարգի ներդրման և գործարկման կարգը (այդ թվում փորձնական).

26.5) սահմանում է ուսումնական հաստատությունների անվանակոչության կարգը.

26.6) սահմանում է հանրակրթական ուսումնական հաստատություններում հեռավար կրթության կազմակերպման կարգը.

26.7) սահմանում է ուսումնական հաստատությունների վարչական և մանկավարժական աշխատողների էթիկայի նորմերը (վարքականոն).

26.8) սահմանում է հանրակրթական ուսումնական հաստատություններում գործածվող փաստաթղթերի ցանկը.

26.9) մշակում և հաստատում է պետական հանրակրթական ուսումնական հաստատության զարգացման ծրագրի օրինակելի ձևը.

26.10) սահմանում է հանրակրթական ուսումնական հաստատության ղեկավարման իրավունք (հավաստագիր) ստանալու նպատակով վերապատրաստման և վերապատրաստող կազմակերպության ընտրության կարգը.

26.11) սահմանում է **«Տարվա լավագույն ուսուցիչ», «Տարվա լավագույն տնօրեն» և «Տարվա լավագույն դաստիարակ» մրցույթների կարգերը.**

26.12) սահմանում է կրթության պետական կառավարման լիազորված մարմնի կողմից սահմանամերձ կամ բարձրլեռնային բնակավայրերի պետական ուսումնական հաստատություններ համապատասխան մասնագետ

գործուղելու կարգը.

26.13) հաստատում է Հայաստանի Հանրապետության պետական բյուջեով նախատեսված ծրագրերի և միջոցառումների իրականացման և ֆինանսավորման կարգերը, ֆինանսավորման գործակիցները և նորմատիվները:»:

Հոդված 4. Օրենքի 33-րդ հոդվածի 2-րդ մասը շարադրել հետևյալ խմբագրությամբ.

«2. Ուսումնական հաստատությունում կրթության բնագավառի օրենսդրության պահանջներին նկատմամբ պետական վերահսկողությունն իրականացնում է Հայաստանի Հանրապետության կրթության տեսչական մարմինը:»:

Հոդված 5. Օրենքի 34-րդ հոդվածի 8-րդ մասը շարադրել հետևյալ խմբագրությամբ.

«8. Արտաքին գնահատման ընթացքում օգտագործվում են Հայաստանի Հանրապետության կրթության տեսչական մարմնի իրականացրած ստուգումների արդյունքները:»:

Հոդված 6. Սույն օրենքն ուժի մեջ մտնելուց հետո սույն օրենքի 2-րդ հոդվածով և 3-րդ հոդվածի 1-ին և 4-րդ մասերով նախատեսված ենթաօրենսդրական իրավական ակտերի ընդունման ժամկետ սահմանել մինչև 2020 թվականի հուլիսի 1-ը:

Հոդված 7. Սույն օրենքն ուժի մեջ է մտնում պաշտոնական հրապարակման օրվան հաջորդող տասներորդ օրը: